

- लोकसभा चुनाव रा दूजा दौर मांय पर्चा दाखिल करण रो काम पूरो व्हयो- ई दौर मांय राज्य री 13 सीटां माथे 304 पर्चा दाखिल करी ज्या ।
- राज्य मांय लोकसभा री 25 सीटां माथे चुनाव लड़ रह्या उम्मीदवारां रा नाम तैय -घणखर सीटां माथे भाजपा अर कांग्रेस बीचे सीधो मुकाबलो ।
- राज्य रा मुख्य निर्वाचन अधिकारी पुलिस रा अहलकारां ने सोशल मीडिया माथे चौबीस ई घंटा करडी निजर राखण रा हुकम दीना ।
- प्रदेश मांय केई ठौडां हल्की बारिश -काल अर छह अप्रैल ने कटे-कटे बादळा व्हेवण अर छांटा-छिडका रा आसार ।

000

लोकसभा चुनाव रा दूजा दौर सारू नामपाना दाखिल करण री मियाद आज पूरी व्हेवण सागे ई नामपाना दाखिल करण रो काम पूरो व्हे ग्यो । हाल तांई मिली जाणकारी रे मुजब 218 उम्मीदवार 304 पर्चा दाखिल कीना है । भीलवाड़ा ऊं भारतीय जनता पार्टी रा उम्मीदवार दामोदर अग्रवाल अर बांसवाड़ा लोकसभा सीट ऊं महेंद्रजीत सिंह मालवीय पर्चा दाखिल कीना । ई मौके मुख्यमंत्री भजन लाल शर्मा दोन्यू ठौडां जनसभा कीनी । जालौर ऊं कांग्रेस रा उम्मीदवार वैभव गहलोत ई नामपानो दाखिल कीनो । ई मौके राख्यी ज्यी नामांकन सभा ने कांग्रेस रा आला नेता अर राज्य रा पैली वाळा मुख्यमंत्री अशोक गहलोत, प्रदेश कांग्रेस अध्यक्ष गोविंद सिंह डोटासरा अर विधानसभा मांय विपख रा नेता टीकाराम जूली ई संबोधित कीना । चित्तौड़गढ़ ऊं कांग्रेस रा उम्मीदवार उदयलाल आंजना ई नामपाना दाखिल कीनो । ई मौके पार्टी रा अध्यक्ष मल्लिकार्जुन खड़गे, प्रदेश प्रभारी सुखजिंदर सिंह रंधावा अर राज्य रा पैली वाळा उपमुख्यमंत्री सचिन पायलट ई मौजूद रह्या । बांसवाड़ा सीट ऊं कांग्रेस रा अरविंद सीता डामोर पर्चा दाखिल कीनो । पाली मांय महात्मा गांधी री पोशाक मांय पर्चा दाखिल करण सारू पूग्या दीपक बामणिया निर्दलीय उम्मीदवार रा तौर ऊं नामजदगी रो पर्चा दाखिल कीनो । बागीदौरा विधानसभा सीट माथे व्हे रह्या उपचुनाव सारू ई भारतीय जनता पार्टी रा उम्मीदवार सुभाष तंबोलिया नामपानो दाखिल कीनो । ई सागे ई राज्य री सगळी 25 लोकसभा सीटां माथे चुनाव लड़ रह्या उम्मीदवारां रा नाम तैय व्हे ग्या है । घणखर सीटां माथे भाजपा अर कांग्रेस रा उम्मीदवारां बीचे सीधो मुकाबलो है । हालांकि बाड़मेर सीट माथे तीन उम्मीदवारां बीचे खास मुकाबलो है । पर्चा दाखिल करण री मियाद पूरी व्हेवण तांई कांग्रेस आधिकारिक तौर ऊं बांसवाड़ा सीट ऊं उम्मीदवार रा नाम रो ऐलाण नी कीनो हो, हालांकि कांग्रेस रा उम्मीदवार रा तौर ऊं अरविंद डामोर पर्चा दाखिल कीनो है । ई सीट माथे भाजपा रा महेंद्रजीत सिंह मालवीय अर भारत आदिवासी पार्टी रा राजकुमार रोत रा पर्चा समेत 10 नामपाना दाखिल करी ज्या है । भारतीय जनता पार्टी सगळी 25 सीटां माथे उम्मीदवार उतार्या है, जद के कांग्रेस सीकर सीट सीपीआई (एम) सारू अर नागौर सीट सहयोगी पार्टी आर.एल.पी. सारू छोड़ दीनी है ।

000

राज्य मांय लोकसभा चुनाव रा दूजा दौर रा तैत पर्चा दाखिल करण री मियाद पूरी व्ह्यां पाछे निर्वाचन विभाग री ओर ऊं जारी आंकडां रे मुजब जालौर सीट माथे सब ऊं बत्ता 29 उम्मीदवार पर्चा दाखिल कीना, जद के झालावाड़-बारां ऊं सात, उदयपुर अर बांसवाड़ा ऊं आठ-आठ, राजसमंद ऊं 13, टोंक-सवाईमाधोपुर अर भीलवाड़ा ऊं 16-16, अजमेर अर पाली ऊं 17-17, जोधपुर ऊं 18, बाड़मेर ऊं 20, चित्तौड़गढ़ ऊं 22 अर कोटा ऊं 27 उम्मीदवार पर्चा दाखिल कीना । दूजी कानी बागीदौरा विधानसभा सीट माथे व्हे रह्या उपचुनाव सारू 5 उम्मीदवार छह नामपाना दाखिल कीना है । काल आं पर्चा री जांच करी जावेला । उम्मीदवार आठ अप्रैल तांई नाम पाछा ले सके है । चुनाव रा दूजा दौर सारू 26 अप्रैल ने वोट पड़ेला अर 4 जून ने वोटों री गिणती करी जावेला ।

000

लोकसभा चुनाव मांय वोट देवण वाळां री बत्ती ऊं बत्ती भागीदारी तैय करण सारू जाग जगावण बाबत् राज्य मांय न्यारा-न्यारा कार्यक्रम राख्या जा रह्या है । डूंगरपुर मांय निर्वाचन विभाग री ओर ऊं मतदाता जागरूकता वाहन रैली निकाली ज्यी । केकड़ी मांय रन फॉर वोट राख्यी ज्यी, जिण मांय 21 महकमां रा अहलकार अर कर्मचारी शिरकत कीनी । टोंक जिला मांय देवली री स्कूल मांय खुद री फोटो खींचण री ठौड-सेल्फी प्वाइंट बणा र वोट जरूर देवण रो संदेश दियो ज्यो । बून्दी मांय काल ऊं 12 अप्रैल तांई

खास कार्यक्रम राख्या जावेला। कोटपूतली हलका मांय स्वीप रा तहत राजकीय अंबेडकर छात्रावास मांय जागरूकता कार्यक्रम राखी ज्यो। ई दौरान पोस्टर प्रदर्शनी रे जरिये वोट देवण री प्रक्रिया री जाणकारी दीरीजी। झालावाड़ जिला रा मनोहरथाना मांय विद्यार्थी प्रभात फेरी निकाळी ज्यी। ई सागे ई चुनाव ऊं जुड्या नारा, पोस्टर, कविता पाठ, मेहन्दी अर रंगोली मांडण री होडां राखी ज्यी। ई दौरान विद्यार्थियां अर शिक्षकां ने वोट देवण री शपथ दिरायी ज्यी। केन्द्रीय संचार ब्यूरो सवाईमाधोपुर री ओर ऊं गादोता अर देवता गांवां मांय रंगोली बणावण अर संगोष्ठी रा कार्यक्रम राखी ज्यो।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्यो संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है ब्यावर जिला रा रायपुर रा महेन्द्र सिंह रो संदेश-

000

भारतीय जनता पार्टी रा स्टार प्रचारक अर प्रधानमंत्री नरेन्द्र मोदी रो काल प्रदेश मांय पार्टी रा उम्मीदवारां री हिमायत मांय जनसभावां करण रो कार्यक्रम है। चूरु मांय भाजपा रा उम्मीदवार री हिमायत मांय व्हेवण वाळी प्रधानमंत्री री सभा ने ध्यान राखता थकां प्रशासन री ओर ऊं हिफाजत जरूरी बन्दोबस्त करी ज्यो है। प्रधानमंत्री रो 6 अप्रैल ने अजमेर कने पुष्कर मांय व्हेवण वाळी चुनावी रैली ने सम्बोधित करण रो ई कार्यक्रम है।

000

आकाशवाणी समाचार जयपुर री ओर ऊं समाचार बुलेटिन मांय खास श्रृंखला सरु करी जा रही है, जिण मांय एक-एक संसदीय हलका री चुनावी हलचल री जाणकारी दी जावेला। आज पेश है चूरु सीट रो चुनावी हाल-

राज्य मांय लोकसभा चुनाव मांय पैला दौर मांय ज्यां 12 सीटां माथे 19 अप्रैल ने वोट पड़ेला, वां मांय चूरु सीट माथे सगळां री निजर है। ई सीट माथे ई दफा मज्जदार मुकाबलो है। पेश है म्हाणा खबरनवीस री रपट-

000

राज्य रा मुख्य निर्वाचन अधिकारी प्रवीण गुप्ता सगळा जिलां रा एस.पी. ने सोशल मीडिया पोस्ट माथे चौबीस ई घंटा निजर राखण रा हुकम दीना है। वे चुनाव रे दौरान मीडिया माथे निजर राखण रा बारा मांय आज वीडियो कॉन्फ्रेंस रे मार्फत सगळा जिलां रा एस.पी. अर सूचना अर जनसम्पर्क विभाग रा जिला स्तर रा अहलकारां अर जयपुर अर जोधपुर रा पुलिस उपायुक्तां सागे चर्चा कर रहया हा।

मीटिंग मांय पुलिस महानिरीक्षक शरत कविराज बतायो के लोकसभा चुनाव ने ध्यान राखता थकां राज्य मांय सोशल मीडिया पोस्ट माथे असरदार निगराणी राखी जा रही है अर सोशल मीडिया माथे गलत अर भरमावण वाळी खबरां चलावण वाळां रे खिलाफ पुलिस कार्यवाही कर रही है। कविराज बतायो के राज्य स्तर री मीडिया मॉनिटरिंग कमेटी री सिफारिश पाछे हाल ताई 7 भरमावण वाळा अर विवादास्पद पोस्ट हटायी ज्यो है अर एक जणा ने गिरफ्तार करी ज्यो है।

000

राज्य मांय तापमान सामान्य बण्योडो है। ई बीचे लारला चौबीस घंटा मांय हनुमानगढ़, चूरु, झुन्झनू, सीकर अर आरे-सारे रा हलकां मांय छांटो-छिड़को व्ह्यो। ई दौरान राज्य मांय दिन री बगत सब ऊं बत्तो 39 डिग्री सेल्सियस तापमान कोटा मांय दर्ज करी ज्यो। राजधानी जयपुर मांय अधिकतम तापमान 35 दशमलव 8 डिग्री सेल्सियस दर्ज करी ज्यो। मौसम विभाग रे मुजब आज राज्य रा उत्तराद-ऊगणी हलकां मांय बण्या परिसंचरण तंत्र ऊं बीकानेर, कोटा अर उदयपुर संभाग मांय बादळा मंड्या रेहवण अर कठे-कठे छांटो छिड़को या हल्की बिरखा व्हेवण रा आसार है। काल अर छह अप्रैल ने ई राज्य रा कुछ हलकां मांय बादळा मंड्या रेहवण अर कठे-कठे हल्की बिरखा व्हेवण या छांटो-छिड़को व्हेवण रा आसार है।

000